



BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
KANTONALNO TUŽILAŠTVO
UNSKO-SANSKOG KANTONA
BIHAĆ

Broj: A-606/18

Bihać, 19.06.2018. godine

V O D I Č
ZA PRISTUP INFORMACIJAMA
U KANTONALNOM TUŽILAŠTVU UNSKO-SANSKOG KANTONA

Bihać, juni 2018. godine

| Bosna i Hercegovina, Federacija Bosne i Hercegovine | Kantonalno tužilaštvo Unsko-sanskog kantona |

Adresa: Bosanska 2, 77000 Bihać, Telefon: 037/222-252 - centrala, Telefon: 037/224-138 - glavni tužilac, Telefaks: +38737/222-270
Elektronska pošta: kt-bihac@pravosudje.ba, Web stranica: kt-bihac.pravosudje.ba

Na osnovu člana 20. Zakona o slobodi pristupa informacijama u Federaciji Bosne i Hercegovine („Službene novine Federacije BiH“, broj: 32/01 i 48/11) i Uputstva za provođenje Zakona o slobodi pristupa informacijama u Federaciji Bosne i Hercegovine („Službene novine Federacije BiH“, broj: 57/01), glavna tužiteljica Kantonalnog tužilaštva Unsko-sanskog kantona, d o n o s i:

V O D I Č
ZA PRISTUP INFORMACIJAMA
U KANTONALNOM TUŽILAŠTVU UNSKO-SANSKOG KANTONA

I

Svaka fizička i/ili pravna osoba ima pravo podnijeti zahtjev za pristup informacijama koje su pod kontrolom Kantonalnog tužilaštva Unsko-sanskog kantona u Bihaću (u daljem tekstu: Tužilaštvo), u skladu sa Zakonom o slobodi pristupa informacijama u Federaciji Bosne i Hercegovine.

II

Sjedište Tužilaštva je u Bihaću, ul. Bosanska br. 2, 77 000 Bihać, telefon 037/222-252, telefax 037/222-270.

Ovaj vodič se može dobiti u pisarnici Tužilaštva kao besplatan primjerak, te je dostupan i na web stranici Tužilaštva www.kt-bihac.pravosudje.ba.

III

Pristup informacijama koje su pod kontrolom Tužilaštva ostvaruje se podnošenjem pismenog zahtjeva na jednom od jezika u Federaciji BiH.

Pismeni zahtjev treba da sadrži:

- ime i prezime ili naziv pravne osobe podnosioca, tačnu adresu prebivališta ili sjedište pravne osobe, te eventualno broj telefona ili telefax-a,
- dovoljno podataka o prirodi i/ili sadržaju tražene informacije, kako bi službenik za informisanje uz razuman napor pronašao traženu informaciju,

Zahtjev se podnosi lično i predaje u pisarnici Tužilaštva (I sprat) ili putem pošte na adresu Tužilaštva. Podnošenje zahtjeva je besplatno.

Ako se zahtjev odnosi na ličnu informaciju zahtjev može podnijeti samo fizička osoba na koju se zahtjev odnosi, njen zakonski zastupnik ili osoba koju je podnosilac zahtjeva pisano ovlastio za pristup informaciji.

Ako zahtjev podnosi fizička osoba na koju se informacija odnosi dužna je zahtjev potpisati i pokazati identifikacioni dokument sa fotografijom. Ako zahtjev podnosi zakonski zastupnik podnosioca zahtjeva ili osoba koju je podnosilac zahtjeva pisano ovlastio za pristup informaciji, dužan je zahtjev potpisati, pokazati svoj identifikacioni dokument sa fotografijom, dokaz o zakonskom zastupanju odnosno punomoć, kao i fotokopiju ličnog dokumenta podnosioca zahtjeva.

Ako Tužilaštvo nije u mogućnosti udovoljiti zahtjevu za informaciju zbog odsustva formalnih uslova iz stava 2., 3. ili 4., tačke III ovog Vodiča, o tom rješenjem obavještava podnosioca zahtjeva u roku od 8 (osam) dana od dana prijema zahtjeva.

IV

Nakon prijema zahtjeva za pristup informacijama Tužilaštvo poduzima sve potrebne radnje da pribavi traženu informaciju.

O zahtjevu se odlučuje rješenjem koje se dostavlja podnosiocu zahtjeva u roku od 15 (petnaest) dana od dana prijema zahtjeva. Rješenje kojim se u cijelosti ili djelimično odobrava pristup informacijama sadrži:

- obavještenje o mogućnosti ličnog pristupa informacijama,
 - obavještenje o mogućnosti umnožavanja i troškovima umnožavanja, uz napomenu da se umnožavanje odobrava nakon izvršene uplate,
 - priloženu fotokopiju tražene informacije, kada se ista osigurava besplatno.
- Cijena troškova umnožavanja tražene informacije iznosi:
- 0,50 KM za svaku stranicu standardne veličine koja prelazi 10 (deset) prvih besplatnih stranica,
 - 5,00 KM po disketi za elektronsku dokumentaciju.

V

Tužilaštvo može utvrditi izuzetak od saopćavanja informacije u slučaju kada se saopćavanjem informacije može očekivati izazivanje značajne štete za sljedeće legitimne ciljeve Federacije BiH:

- interes odbrane i sigurnosti, kao i zaštita javne sigurnosti,
- sprječavanje kriminala i otkrivanje kriminala,
- zaštita postupka donošenja odluka u Tužilaštvu, uključujući davanje mišljenja, savjeta ili preporuka, bilo da se radi o osobi zaposlenoj u Tužilaštvu ili drugoj osobi koja učestvuje u radu u Tužilaštvu, s tim da to ne obuhvata činjenične, statističke, naučne ili tehničke informacije.

VI

Kada se utvrdi da zahtjev za pristup informaciji uključuje povjerljive komercijalne interese treće strane, Tužilaštvo bez odlaganja pismeno obavještava treću stranu o pojedinostima zahtjeva i upozorava je da će traženu informaciju saopćiti ako, u roku od 15 (petnaest) dana od dana prijema obavještenja, pismeno ne odgovori da smatra da je informacija povjerljiva i navede razloge zbog kojih bi njenim saopćavanjem mogla nastupiti šteta.

Nakon prijema odgovora iz prethodnog stava Tužilaštvo će utvrditi izuzetak od saopštavanja tražene informacije (ako razloge ocijeni opravdanim).

VII

Tužilaštvo utvrđuje izuzetak od saopćavanja tražene informacije ako osnovano utvrdi da informacija uključuje lične interese koji se odnose na privatnost treće osobe.

VIII

Tužilaštvo će saopćiti informaciju bez obzira na izuzetke iz tačke IV, V i VI ovog Vodiča ako to opravdava javni interes.

Ukoliko Tužilaštvo odluči, u cilju zaštite javnog interesa, saopćiti informaciju, mora voditi računa i procijeniti korist i štetu koja može proizaći iz saopćavanja informacije. U ovom slučaju Tužilaštvo rješenjem obavještava treću stranu da će informaciju saopćiti po isteku 15 (petnaest) dana od dana prijema tog rješenja. Navedeno rješenje sadrži pouku o pravu na žalbu, naznaku i adresu organa kojem se žalba podnosi, kao i uputu o pravu obraćana Instituciji ombudsmena Federacije Bosne i Hercegovine.

IX

Ovim se ne ograničavaju prava i obaveze fizičkih i pravnih osoba koje se odnose na pristup informacijama u skladu sa Zakonima o krivičnom i drugim tužilačkim postupcima.

X

Pravila utvrđena ovim Vodičem ne primjenjuju se u postupcima po zahtjevu za pristup informacijama podnesenim od strane predstavnika sredstava javnog informisanja (medija).

XI

Ovaj Vodič stupa na snagu danom donošenja.

XII

Stupanjem na snagu ovog Vodiča, prestaje da važi Vodič za pristup informacijama u Kantonalnom tužilaštvu Unsko-sanskog kantona Bihać broj: A-740/05 od 19.09.2007. godine.

Broj: A-606/18

Bihać, 19.06.2018. godine



GLAVNA KANTONALNA TUŽITELJICA

Fadila Amidžić